



Te Mate o Tā Sione Spaghetti

Nā John Carr i tuhituhi
Nā Mike Wilkin ngā pikitia



Te Mate o Tā Sione Spaghetti



E rua ngā mea i tino aroha a Sione, ko tētahi ko Spaghetti – ehara i te kai nei, engari ko Spaghetti te rāpeti i noho ki te rāihe i te iāri i muri i tō Sione.




I tapaina a Spaghetti i mua ko Fluffy engari i tētahi rangi i rere ia i tōna rāihe i waenganui i tētahi āwhā whatitiri. I wehi ia i te uira me te whatitiri. I te kitenga o Sione i a ia i raro i tētahi mauwha i te papa rēhia tūtata, kāore ia i te kerehunga tonu. Kua mākū ōna huru, kua tāwhiwhi.

“He rite ia ki te oko pāketi!” e kī ana a Kōkā Masina.

Mai i tērā wā ka tapaina a Fluffy ko Spaghetti.



I pai tonu te tiaki a Sione i a Spaghetti. Āta whakaritea ana e ia he wai māori, mā hoki kei tāna pātara wai i ngā wā katoa, he pātītī hōu, ngā kākāriki o te māra me ngā pata rāpeti hauora hei kai, he takapau maroke hoki hei moenga mōna.




Ka tango hoki a Sione i a Spaghetti i tōna
rāihe hei tākaro tahi ki a rāua ko tōna teina,
ko Lelei.



Ko te mea tuarua i aroha a Sione ko te whutupōro. He rawe ki a ia te maka, te hopu, te rutu, te kiki kōura, te paneke piro, te peke rārangi, te oke kakari, te karawheta kakaritanga me te “hurō” torohū i te mutunga o te kēmu.

I ngā ata o ngā Rāhoroi, i purei whutupōro a Sione mō ngā Rinorino Ririnui. I ngā Rātapu, i purei whutupōro rīki ia mō ngā Rēparo o Rehetono ki te heipū mai he tūranga wātea.



I tētahi ahiahi, i mua i te whakawai whutupōro, i te tākaro a Sione me Spaghetti hei tōna tikanga, engari i whakaaro ia kāore i koa a Spaghetti.

Kātahi ka peka mai a Kōkā Masina rāua ko Lelei.

“He pōuri a Spaghetti,” i mea a Sione. “Kua pīngawi ōna taringa, kua pakupaku tāna pekepeke.”

“Tērā pea kei te pīrangi hoa ia,” ka mea a Kōkā Masina, i nui nei tōna mōhio ki ngā rāpeti me ērā atu mea katoa hoki.

“Engari ko au tōna hoa,” ka mea a Sione.

“He hoa rāpeti tāku e kōrero nei,” ka mea a Kōkā Masina. “He pai ki te rāpeti te whai hoa, pēnei i a tāua. Ka pēhea hoki te āhua o te whutupōro ki te kāhore ō hoa hei tākaro tahi?”



Ka whakaaroaro a Sione mō tērā. He tika tā Kōkā Masina. Kāore i taea e ia te pohewa he mea mokemoke atu i te kakaritanga tangata kotahi.

“Me tiki e tātou he hoa mō Spaghetti ināianei tonu!” i mea ia.

“Kāore e pēnā rawa te ngāwari,” i mea a Kōkā Masina. “Me whai tāima ngā rāpeti kia waia ai tētahi ki tētahi. Hei te tīmatanga me noho rāua ki ō rāua rāihe ake. Mā te wā ka whakahoahoa rāua ka noho tahi.”



He raru nui mō Sione te whiwhinga rāihe tuarua. I waimarie ia, he whakaaro tō Kōkā Masina.

“He rāihe heihei tawhito tāku ka pai pea mō tēnā,” ka mea ia, “engari he nui rawa hei uru ki te waka, otirā he taumaha rawa hei tō mai mā tātou ki tō kāinga.”

Ka hurihuri takitaro a Sione.

“Kei a au te whakautu!” i mea ia me te hoatu i a Spaghetti ki a Kōkā Masina. “Ngā kararehe pāwhara!”

“He momo kararehe pāwhara aha?” i karanga a Kōkā Masina i a Sione e oma atu ana. Kāore ia i rongo ki te whakautu a Sione. Ki tōna rongo ko “Rinorino Rīrii”.




I muri i te whakahoki i a Spaghetti ki tōna rāihe, ka titiro a Kōkā Masina ki tua o te papa tākaro. Hūnuku mai ana ki a ia ko tōna rāihe heihei tawhito. Mai i tawhiti i rite ki te taniwha e waru ngā upoko, tekau mā ono ngā waewae, me te nui o te hoihoi i puta i a ia.

Hīkoi ana i muri i te taniwha ko tētahi tangata whai wīhara. I te umere ia, "Whiua! Whiua!"

"Ngā mihi e te kaiako," i mea a Sione ina tū ana te rāihe heihei.


"Kāti te whakawhetai ki ahau," ka mea ia. "Ko tā tātou whakawaiwai kakaritanga pai rawa atu tērā o te tau katoa!"



Aonga ake ka haere a Kōkā Masina, a Lelei me Sione ki te SPCA ki te kimi hoa rāpeti mō Spaghetti. Ka whakakitea ki a Sione e te kaitiaki kararehe he rāpeti parauri-mā. Kua mahue mai e tētahi whānau i haere ki tāwāhi. He rapi tōna i tētahi taringa nā te whawhai ki tētahi ngeru.

SPCA





I aroha pū a Sione ki a ia.
“Ka huaina ia e ahau ko Meatballs,”
ka mea ia.
“Meatballs?” i mea a Kōkā Masina.
“Āe, ko Meatballs,” ka kata a Sione,
“i te mea ka haere tahi te Spaghetti me
te Meatballs.”

He Tīwhiri mō te Rāpeti Harikoa

- He tino pai te rāpeti hei mōkai.
- I te kōraha, he nui te wāhi o te rāpeti. Āta whakarite he wāhi korikori rahi tonu kei tō rāihe hei omaoma mō ō rāpeti, he teitei hoki kia whakatika ai rātou ki ngā waewae o muri.
- He pai ki te rāpeti te kerī me te huna i rō puare. Meatia ki te rāihe ētahi papa rōnaki, pouaka, rarowhenua hoki e huna, e toro haere, e haumarū ai ō rāpeti.
- Tākaro tahi me ō rāpeti ia rā ka tuku i a rātou kia korikori i waho o te rāihe.
- E pai ana te rāpeti ki te takawairore. Waiho te kai i rō takawairore, pērā i te takai pepa heketua. Me rite te huri o aua takawairore kia kore e hōhā te rāpeti.
- I te kōraha, ka piki teitei ngā rāpeti kia tirotiro mō te kino. Meatia ki te rāihe he wāhi hei piki mā ō rāpeti kia tirotiro mō te kino.
- He kararehe noho takitini te rāpeti. Ka hari rātou ina whai hoa rātou i te tangata, i tētahi rāpeti anō rānei.

**Haere ki kids.spcaeducation.org.nz
kia ako tonu i ngā mahi tiaki rāpeti**

Te Marautanga o Aotearoa
taumata 3-4
ākonga tau 6-8
808 kupu

Te Mate o Tā Sione Spaghetti/The Problem with Sione's Spaghetti

© 2016 Society for the Prevention of Cruelty to Animals Education, Auckland, New Zealand

Published by Wendy Pye Publishing Limited for SPCA Education

Nā John Carr i tuhituhi /Text by John Carr

Nā Michael Wilkin ngā pikitia/Illustrations by Mike Wilkin

This edition published 2019

ISBN: 978-1-98-857840-8

All rights reserved. No part of this publication may be reproduced or transmitted in any form or by any means, electronic or mechanical, including photocopy, recording or any information storage and retrieval system, without permission in writing from the publishers.

Distributed in New Zealand by The SPCA
50 Westney Road, Mangere, Auckland 2022